

La Lettre Jèrriaise sanm'di lé 24 d'octobre.

Bouônjour bouonnes gens. Ch'est Jean L'Maistre tch'a l'pliaïsi dé vos présenter la lettre Jèrriaise aniet, san'mdi lé 24 d'octobre deux mille vingt.

À chaque fais qué j'èrchai un coup d'téléphone du sieur Winston Lé Brun, j'mé gratte la tête un mio en chèrchant un sujet assez intéressant pour touos vous, not' audience, qu'êcoutent au radio lé sanm'di matîn. Chutte sémaine j'ai décidé dé continuer lé sujet qué j'entanmit la dreine fais au mais d'juillet. Ch'tait à nos r'souv'nîn dé la vie du temps passé sustout dans la campagne. Les pus jannes tchi font la lettre né peuvent pon faithe chenna et d'même ch'est à nous, les pus anciens, d'èrcorder les choses du temps passé dévânt qué tout ch'la s'trouve pèrdu !

Dans ma d'reine lettre j'mentionnit les vaques qui 'taient à la ferme à Portîfer. La routine pour souongni et traithe les vaques chaque jour était assez simpl'ye mais quand même, i' fallait pas avoir les deux pids dans même soulié ! Et ch'tait du, sept jours-là s'maine et chînquante deux s'maines par an ! I' fallait sé l'ver d'bouonne heuthe pour être seux d'attraper lé lait tchi passé à huit heuthes du matîn. La preunmié tâche en entrant était d'netti l'établ'ye et parfèner du frais êtrain. I' fallait laver l'piéchet à chaque vaque et prépathier lus boutchets dé nouôrritthe. Auprès ch'la tout ch'qu'i fallait ch'tait un d'vanté, eune castchette (ou eune bonnette pour les femmes), un boutchet pour lé lait et eune p'tite scabelle pour sé mettre à traithe. Nou 'tait assis sus la scabelle aue la tête penchie contre la vaque, et si y'avait des moûques souvent nous èrchéver la coue d'la vaque à travers d'la fache ou la tête !

Man grand frêthe François soignait des vaques et vieaux et j'mé rappelle au c'menchement qu'il avait seulement trais vaques à traithe à la main, et v'là tchi prenait dgiêx minutes à traithe chaque vaque. Tout s'lon, sans doute, combein d'lait qu'la vaque voulait li donner ! Si j'mé rappelle étout, en mouoyenne, dans chu temps-là eune vaque pouvait bein donner trais, quatre ou chîng 'pots' d'lait par traite. Auprès traithe y fallait mettre le lait en cannes de siex pots, en utilisant un couleux et sans doute m'suther la d'raine canne s'ou n'tait pas plieine. I' fallait êcrithe un billet avec lé total dé lait et souvent couôrre à la route, avec les cannes sus un p'tit tchéthiot, en espéthant qué lé laitchi n'avait pon acouo passé ! Si, par chance, n'ou l'avait mantchi, i' fallait vite sorti un moto, mettre les cannes à lait dedans et pis chasser vite pour l'attraper en route ! Tout chu travas là finni nous avait l'temps d'dêjeuner. J'dévthais vos dithe dgia, qué quand la machinne à traithe arrivit, pour nous ch'tait eune Melotte, sâpresti nou pouvait traithe deux vaques en même temps ! V'là tchi pèrmetté d'augmenter lé troupe facilement jusqu'à eune douzaine dé vaques, et même pus. J'avions étout eune douzaine dé géniches et tchiques p'tits boeux pour engrâissi. Dans chu temps là j'avions la chance d'aver eune chînquantaine dé vrégies d'hèrbe ès Monts à Grantez, où'est qu'est l'dolmen, et nou pouvait étout y mettre des vaques tchi 'taient à sé. 'Taient-ti contentes d'être toutes à banon ! Mais l'travas n'était janmais finni. Auprès déjeuner i' fallait sorti les vaques, les abréver et les m'ner au clios à la têtchiéthe. Arrivé au clios nou les m'tait au lian et à la tèrrée, et i'taient fitchis avec un païsson. En hivé quand i' faisait froid i' fallait sans doute lus mettre eune couvèrtuthe pour les garder caudes et secs.

Eh bein bouonnes gens, n'en v'là assez pour chute semaine.

Mèrcie pour m'aver écouté aniet.

Gardez sauf, et à la préchaine.